

QUMRAN'GO ESKU-IDAZKIAK

VII GORAPEN-ABESTIA

³⁷Eskerrak emoten dautsudaz, Jauna,
babes sendoa emon zeustalako

³⁸nire ondatzailleen aurka eta [...] astinduko dabezan zoritxarretatik babestu egingo nozu...

³⁹iñor be ez da sartuko [...]

IV SORTA

... ..
³[...] Zeuk jarri zenduzan nire oiñak arkatxean
⁴bide-zidor betikorantz ibilteko.
Nere bide-zidorrak Zeuk aukeratu zenduzan!

VIII GORAPEN-ABESTIA

IV SORTA

⁵Eskerrak emoten dautsudaz, Jauna,
nire aurpegia argiz bete dozulako.
Zure Alkartasuna, egunsentia lakoa.

⁶Nik zintzoro billatzen zaitut;
zure goizaldean diz-diz egiten dozu nire aurrean.

⁷Baiña, oil, zure erriko beste batzui
guzur-zabaltzailleak iruzur egiten dautsoe euren az-
pikeriz.

Errakuntza-adierazleak galerazo egiten dautsoe sus-
moa.

Areik —lilluratuta— euren ondapenera doaz arin.

⁸Arein egintzak zorakeriak baiño ez dira.
Ni, ostera, utsean nauke, ez nabe ontzat artzen,
zure aal-izatea nigan argi-argi agertzen danarren
be.

⁹Txoria beronen apiatik lez bota nenduen nire lu-
rraldetik. Nire adiskide ta senide guztiak urrundu
egin ziran nigandik,
zabor-iturri lez erabili nenduen.

¹⁰Guzurrezko ikusleak, ostera, guzurrezko jaki-
tearen jabeak, Belial'en kimuak, irakaspena alda-
tzea nai izan eben,

¹¹Zuk nire biotzean zizelkatu zenduan irakaspe-
na.

Erriaren arten maltzur-berbak banandurik,
egarritsuena eskuan egoan jakintza-edaria kendu
egin eben.

Patar motelgarriaz moskortu ebezan, arein mosko-
rraz baliatzeko, zorabiotan jausi zeitezana;

¹²areik euren jaietan euren sareetan arrapatzeko
asmotan ziarduen.

Baiña Zuk, Jaungoiko orrek, barre-santzoka,
barre egiten dozu Belial'en asmoen lepotik.

Zure naia burutu egiten da edozela be;
zure asmoa betiko izan ezarria;

Belial'en egitarauak, ostera, galdu-egitarauak dira.

¹³Areik antze-emoilleak soillik dira.

Zu billatzen zaituenean, euren irabaziagaitik da,
zure egiagaitik ez.

Arein asmoak azentzio ta edenezko zusterretik sor-
tzen dira.

¹⁴Euren biotz gogorrek narraz eroanda, bururik
ez dabela doaz.

Euren sasi-jainkoen erdian Zeu aurkitzea uste dabe.
Ain zuzen be, zuzendaritzat eurak ondamentira
eroaten diarduana artzen irauten dabe.

¹⁵Guzurrezko profeten berbak zuzendurik gura
zaitue aurkitzea;

profeta orreik, izkera arrotzez, ezpan motelez,
ameskeriak esan baiño ez dabe besterik egiten.

¹⁶Zure erriari berba egiten dautsoe;
euren maltzurkeriaz zure egitsariai balioa kentzea
gura dabe.

Ez leuke zure abotsik entzun nai,
ezta zure itzari jaramonik egin be.
Agiri-agirian dagoan aurrean, «Ez da orrela» [esan
eben].

Ze erantzun emongo dautsezu, ene Jaungoiko orrek?

¹⁸Zigortu egingo dozuz zure aal-izateaz,
arein dongakeri ta sasi-jainkokeriak euren ordaiña
artuko dabe,

euren lakioetan beretan jausiko dira.

Zure Alkartasunaren zin-ausleak alakoak!

¹⁹Zeure epaiaz ezereztuko dozuz iruzurtiak.

Arrezkero ezin aurkitu izango da sasi-ikuslerik.

²⁰Zure erabagi sendoan ez dago ezbairik, ez
erostarik.

Zeure aurrean iraungo dabe betiko zure maitasuna-
ren gai diranak.

Zure biotzaren bide-zidorrean dabizanak

²¹iñoiz be ez dabe urritasunik jasango.

Nire eusgarri Zeu soillik zaran ezkeru,
ni zapaltzen aalegintzen diranai gogor egiteko jagi-
ko naz.

Niri irri egiten daustenen aurka jagiko da nire es-
kua.

²²Zure aal-izatea neugan agertzen zenduanik
onartu nai ez ebelako.

Jakiña, ba!, indartsu agertuko dozu nigan zure argi
bikaiña.

²³...

²⁴Nire deiari jarraiturik, zure Alkartasunean
sartu ziranen aurpegiak
ez dira lotsatuta geratuko.

Nire esaneko diranak, zeure biotzeko bidetik dozuz
aurrera,

²⁵euren lekua santuen batzaldian artzen dabe.

Arein elburuari azken-garaipena emongo dautsazu.
Kutsatu-eziñezko argitasunaz agerrerezoko dozuz
egia.

Ez dozuz laketuko galduak arei bidea galduazotea.

²⁶Ori azpiz jokatu dagienean, zure errian arein
ustebagetasuna sarrerazoko dozuz.

Auzirako ondapen-tresna lez erabiliko dozuz,

²⁷zure berba-ausleak ondatzeko.

Nire bidez argitu egin dozuz askoren aurpegia
eta zenbatu-eziñak izateraiño geitu zenduzan.

Niri zure ezkutu miragarriak ezaguerazo daustazuz.

²⁸Zure asmo arrigarrian, nigan zeure aal-izatea
agertu zenduan.

Miragarriak egin zenduzan askoren aurrean, zeure
gorapenerako

²⁹eta bizidun guztiak zeure egitsariak ezagutu
dagiezan.

Zein gizaki da gauza orretarako?

Zein buztin-izakik izango dau zure arrigarriak egi-
teko aal-izaterik?

Bestetara bai: gizakia gaiztakeritan datza

³⁰ama-sabelean ezkeru,

eta arek zaartzarorarte maltzur errudun izaten
iraungo dau.

Ba-dakit nik zuzentasuna gizonari ez dagokiona.

Bide-zidorreko bikaintasuna ez da Adan'en semeena
eurena.

³¹Jaungoiko gorengoarenak dira zuzentasun-
egintza guztiak.

Gizonaren bidea, Jaungoikoak aregan eratu dauan
espirituaren indarrez soillik da iraunkor,

³²Adan'en semeen bide-zidorra bikaiña egiteko,
aren jokabide zuzenaz, Jaungoikoaren egintza in-
dartsua ezagutu dagien,

baita Aren naiaren seme guztiakanako erruki ugaria
be.

³³Bildurra eta estureak artu nenduen,

zatitu egin ziran nire azur guztiak,

nire biotza argizaria su-aurrean lez urtzen zan.

³⁴Nire belaunak laban egiten eben —aldapa-bee-
ra txirristaka doan urak lez—

neure erruak eta neure gurasoen maltzurkeria gogo-
ratzean.

Dongak zeure alkartasunaren aurka

eta gaiztoak zeure itzaren aurka jagi izan ziran al-
dian,

³⁵nik auxe esan neban:

Neure agindu-austeagaitik izan naz bertan-beera
itzia

eta zure itunpenetik jaurtia.

Baiña zure eskuaren indarra eta, aldi berean,

³⁶zure erruki ugariak gogora ekarri nebazanean,
adorea ta indarra artu nebazan barriro,

eta, jagirik, nire espiritua indartsua egin zan,

atsekabeari gogor egiteko.

³⁷Zeure ontasunai ta maitesarre azkenbageai
oratu neutsen.

Zuk dongakeria ezereztu eta errua garbitu egiten
dozu.

³⁸Gizonak gelditu bagarik diardu Zuk egin dozuz-
na [begiratzen],

dongea ta zintzoa Zeuk egin dozuz-ta.

³⁹Zeure itunpenaz sendotu nenduzun [...],

⁴⁰zeure aurrean [iraungo dot], egia Zeu zara-ta;
zure egintza guztiak, barriz, zuzenak dira.

V SORTA

¹Zure parkamena ugaria da,
zure errukia oso aberatsa.

²... ..

³[...] au ezagutu nebanean [...]

⁴zeure naitan eta [Zu billatzen zaituen] guzti
arein zentzunean.